

Regional News Unit AIR Aizawl
Wednesday, July 31, 2024

Time - 7:30 -7:40Hrs

REGIONAL NEWS BULLETIN

HEADLINES (MORNING)

- **UD&PA Department hnuaiia Swachh Bharat Mission (Urban) 2.0 leh Save the Riparian ten kum 1 chung atan Faina leh Thianglimna kawnga hmasawna turin thawhona thuthlung an ziak.**
- **Rajya Sabha MP Pu K. Vanlalvena leh CADC CEM Pu Rasik Mohan Chakma, ten Bangladesh ramri hrûla chengte hmasawna tur hrang hrang sorkar laipui hotute an sawipui.**
- **Prime Minister Narendra Modia chuan India chu khawvel tana hmasawna leh muanna meichher chhitu a ni a ti.**
- **Sawrkar laipui chuan kumin March thla thleng khan Production Linked Incentive (PLI) scheme hnuaiiah dilna dilna 755 pawm tawhin cheng vaibelchhe khat leh nuai 23 a pe tawh.**

<><><>

UD&PA

Urban Development & Poverty Alleviation Department hnuaiia Swachh Bharat Mission (Urban) 2.0 leh Save the Riparian te chuan kum 1 chung atan Faina leh Thianglimna kawnga Mizoram khawpuiten hma an sawn theihna turin thawhona thuthlung an ziak.

He thawhona hian Kumin July thla atanga nakum July thla chungga Faina leh Thianglimna bakah bawlhhlawh sawngbawl kawnga mipuite zirtirna kalpui te, lui leh luidung, thing leh mau humhalhna bakah thingphun te, hmankhat daih plastic tihremna kawnga hmalakna te a huam a ni. He thawhona hi UD&PA Director Dr. Andrew H. Vanlaldika leh Save the Riparian atangin President Pu Ngurthanzaua Sailo ten an ziak a ni.

Save the Riparian-te hian kumin March thla atang khan ni 50 chung Aizawl khawpui chhungah luikawr thenfai hna an lo thawk tawh a, an hmalakna tawiawm hian mipui tam tak bakah ram hruaitute pawh an lo thawkchhuak tawh a ni. Kumin kum 2024 chung hian UD&PA nena tangkawpin District Headquarters tinah awareness campaign neih tura ruahmanna siam a ni bawk.

<><><>

ROADSIDE RESERVED FOREST

Kawnpui khuaa Kolasib District chung khaw hrang hranga ram neitu kal khawmte chuan Resolution siamin, Roadside Reserved Forest chungga chengte dinhmun chu sawrkarin tichiang vat se an duh tih an sawi.

Ram neitute thuchhuah tarlan dan chuan, Forest Act 1955 tlawh chhana RRF Notification 1965, High Court-in kum 2021 January ni 27-a a lo hnawl tawh, tun hnaia Supreme Court-in tinung leh tura Stay Order a tih chhuah chungchangah resolution siamin RRF Notification a nun leh tak avangin Forest ram chhunga chengte pawh hnawt chhuakin an chenna tur ngaihtuahsak se an duh thu an sawi a.

Ram leh mipui tana hnawksak RRF Notification 1965 tinung leh tura Supreme Court-a Mizoram Environmental NGO Coordination bultuma Petition thehluttu Vanramchhuangi, VL Hrima, Romalsawma, Rongura Hrahseleh leh Dr.Lalbiakmawia Ngente te chu an dem tih sawiin Environmental NGO te chu mipuite harsatna siamtu leh ram hmasawna daltu dik tak an ni, an ti a.

NGO ten thu dik tawh lo hmanga Court-a petition an thehlut hi hnuk kir se an duh thu an sawi a. Reserved Forest puan a nih dawnin mipuiah puanzarna awm lovin chhuah tawp a ni tih sawiin Reserved Forest puang tura danin a phutte an zawm lo, an ti bawh.

Ram neitute chuan RRF Notification 1965 chu thiah a nih theih nan sawrkarin hma la se an duh tih sawiin Supreme Court pawhin mipuite dinhmun thlir chunga thutlukna dik tak a siam ngei an beisei tih an sawi bawh.

<><><>

RAJYA SABHA MP

Rajya Sabha MP Pu K. Vanlalvena leh Chakma Autonomous District Council (CADC), Chief Executive Member (CEM) Rasik Mohan Chakma, MLA te chuan Union Home Secretary for Border Management, Dr. Rajendra Kumar-a a pisaah hmuin Bangladesh ramri hrula chengte hmasawna tur hrang hrang an sawiho.

Indo-Bangladesh ramri hung pawna mihring chengte chu an chungchang ngaihtuah a ÷ul thu Union Home Secretary hnenah hian an thlen a. Ramri hung chhunga in leh lo dinsak an ÷ul thu te leh kum tam tak kal tawha BRTF te kawngpui siam chuan ngaihsak a hlawh loh avangin sawrkar laipuiin ngaihsak thuai se an duh thu an thlen bawh a. Kum 2021-a Bangladesh ramri hrula chengte hmasawna tur project theh luh tawh tun thlenga hmalakna hmuh tur la awm lo chungchang an thlen bawh.

Union Home Secretary Dr. Rajendra Kumar chuan a rang thei ang bera lo bawhzuisk a tum thu MP leh amah tawiawmute hi a lo hrih a ni.

<><><>

SERCHHIP DC

Serchhip DC Pu Paul L. Khuma hovin a pisaah Lumtui Zau, Zawlpui, Serchhipa chirh leh leitawh vanga lo neitute harsatna tawh dan sawihona neih niin hmalak chhonzawm zel dan tur an rel a.

Kawngpui laih zauin a nghawng kal zelah furpui a lo thlen tak bawh si avangin spoil bank atanga chirh leh lei tawhlin Zawlpui leilet a tichhe nasa hle a. DC Office kaihhruiin July ni 16 khan Zawlpui leilet te a hmunah kalchilhin enho a lo ni tawh a. Hemi tuma an thutluknate bawhzui a nih dan te an sawiho a ni.

Contractor leh NHIDCL hotute hian an hmalak dan meeting ah hian an thlen a. An hmalaknaah dukhawp lohna a la tam avang leh leilet neitute harsatna chinfel a la nih loh cheu avangin, August ni 5 hian leilet hmunte chu DC Office kaihruaina hnuaiah enho leh tura ruahhmanna siam a ni.

Meeting-ah hian DC Office atangin Addl. DC Pu Lalrinzuala leh SDC Pu Lalhruailiana Zote te an tel a. NHIDCL atangin EE Pu Rahul Kumar a tel a; KRAM Infracon atangin AGM Pu Manoj Kumar, Addl GM Pu Sachin Masih, leh PM Devendra Verma te an tel a. Lumtui Field Management Committee atangin Pu C. Lalramzauva, Pu PC Zosangliana leh Pu Lalntlanthanga te an tel bawk a ni.



TOURISM MINISTER

Khualzinte hîp tura hmalakna chi khat chawlhkar khat chhung aw h tur, Tourism Awareness Week hman mekah nimin khan Tourism Minister Pi Lalrinpuii'n sorkar hmunhma mimal kuta a hlan tak enkawltute zirtirna hun a hawng.

Tourism Department buatsaih ni 4 chhung aw h tur, 'Training for Outsource Facilities' hi ATI Training Hall, MINECO Aizawlah hawngin Minister chuan sawrkarin Tourism Department hnuai hmunhma pawimawh tak tak a neihte thawhdunna siama midang enkawl tura a hlan chhan hriatthiampui turin kalkhawmte a chah a; tha leh zual zawka hmunhma leh hmanraw neih angte neitu thinlung pu chung a enkawlpui turin a sawm nghal bawk a. Khualzin dawnawn, ei leh in siam dan, nun dan leh hawiher siam that leh sum enkawl dan chungchang thlengin uluk taka ngaihtuahna sen a tul, a ti a. Tourism chu chhiah la lut thei Department a nih piah lamah mipuite ngheng reng Department a nih avangin theihtawp chhuah turin a chah bawk.

Hun hman hi ATI Jt. Director (Admin) Pu Lalmansanga'n kaihruiin Course Director, Pi Golda Del Zohmangaihi'n training kalpui dan tur a sawifiah a. Tourism Department Director Pi R.Lalrodingi'n Mizoram Tourism dinhmun tarlangin trainee-te fuihna thu a sawi bawk.



LUNGLEI - COOPERATIVE

Mizoram Youth Commission (MYC) Chairman Pu Malsawmzuala Ralte chuan Mizo thalaiten ram pawn thlenga eizawna an neih theih nan hmalak zel a ni, a ti.

Lunglei Convention Center-a Cooperative chungchang zirhonaah nimin khan he thu hi sawiin Pu Malsawmzuala Ralte chuan MYC kaltinga Mizoram sorkarin All India Service-a Mizo thalai a tam thei ang ber tling tura hma a lakna, Super IAS tih thin chu Mission UPSC tia thlak a ni a, thalai lehkhathiamte All India Service-ah nawr luh zel tum an ni, a ti a.

British sipai-ah Mizo thalaite an luh theih nan hmalak mek a nih thu pawh sawiin Cabin Crew-a Mizo nulate an luh theih nan Indigo Airlines Company leh Mizoram Sorkar chu an indawr mek, a ti a. Mizo thalaite eizawna atan Japan thiamna hman tum a nih dan te leh Hotel Management leh Skill development lamah te tan lak zel a nih tur thu a sawi bawk.

MYC leh Lunglei District Cooperative Union ten Cooperative chungchang zirhona an buatsaihah hian thupui thlan bik hrang hranga mithiamte thuziak ngaihthlak a ni.



MAMIT – NEW CRIMINAL LAWS

Mamit khawpui chhunga NGO hruaitute, MJA, Police leh Excise and Narcotics department te tan India ram dan thar, New Criminal Laws zirhona buatsaih a ni.

Mamit Dist. Court Recreation Hall-a District Legal Services Authority bultuma zirhona hunah hian Bhartiya Nyaya Sanhita, 2023; Bharatiya Nagarik Suraksha Sanhita, 2023 leh Bharariya Sakshya Adhinyam, 2023 te zirho a ni a. Mamit Chief Judicial Magistrate Pu H. Laldusanga'n heng Dan tharte hi zirtirin hun inher dan leh khawsak azirin dan hman pawh thlak emaw tihdanglam emaw a ngai thin a. Chutih rualin tun hunah dan hlui leh thar danglamna sawifak tur a la awm lova, dan bu hlui leh thar nen chhiar kawpin inzir chhoh mek a ni, a ti a.

Kum 164 chhung lo hman tawh IPC, CrPC, Indian Evidence Act te chu phum bo a ni a, amaherawh Dan thar te hi kumin July ni 1 atanga hman tan a nih avangin July ni 1 hmaa thubuai awm zawng zawngte chu dan hlui hnuai rem tur a la ni, a ti a. Dan tharin a paih then leh a dah belh hrang hrangte a sawifiah bawk.

Dan thar pakhatat nupuia nei tura intiam vanga mipat hmeichhiatna hmanpuia nei leh duh si lo chungah hremna pek theih a ni tawh dawn a. Dam chhung lungin tan hun chhung pawh dan tharah chuan hun bithliah awm tawh lovin dam chhung chu mihring dam chhung a ni tawh dawn bawk a. Dam chhung tang turin a tan chhunga mi a that leh a nih chuan khaihllum nghalna dan thar a awm tawh bawk a. Dan tharah hian tunhmaa hmeichhia leh mipa chauh awm thin chu mahni mipat hmeichhiatna thlak danglamtu 'trans gender' te huamin mi chi hrang pathum an awm tawh dawn a ni, a ti.



PM

Prime Minister Narendra Modia chuan India chu khawvel tana hmasawna leh muanna meichher chhitu a ni a ti. Nimina Journey Towards Viksit Bharat: A Post Union Budget 2024-25 Conference' New Delhi-a neih a hawnaah he thu hi sawiin Pu Modia chuan sawrkarin khawsak awlsamna turte, thiamthil hmasawna tur leh hna siam kawngahte theihtawp chhuahin hma a la a ti a. MSME ten hna thar tam zawk an siam theih na tur chu ngaihpaawimawh anih thu a sawi bawk a. Ramchhung sum dehchhuah GDP chu zaa pariatin a thang a, hun reiloteah khawvela ram economy lian pathumna a ni thuai ang a ti bawk.



PLI SCHEME

Sawrkar laipui chuan kumin March thla thleng khan Production Linked Incentive (PLI) scheme hnuaiah dilna dilna 755 pawm tawhin cheng vaibelchhe khat leh nuai 23 a pe tawh. Union Minister of State for COMmerce and Industry Jitin Prasada chuan Lok Sabha-a ziaka zawhna chhangin hna thar nuai 8 chuang he scheme vang hian siam belh a ni a ti a. PLI scheme hnuaiah ramchhunga thilsiam chhuah leh rampawna thawnchhuah ti changtlung turin cheng vaibelchhe nuai 1.97 ruahman a ni a tih a sawi a. PLI hian a tum ber chu secotr pawimawha sum peipungtute hip leh technology tha ber ber hmang a thilsiam chhuahna lamah tha zawk leh rintlaka hmalak a ni a ti bawk.

<><><>

PARIS OLYMPIC

Paris Olympic neih mekah India mipa hockey team te chuan Ireland hnehin group stage ah vawi hnih an chak tawh a. Yves-du-Manoir stadium-a inkhelah Pool B-a an chak tum hnihna turin Ireland h 2-0 in an hneh a ni. Heti hian Pool B ah India mipa hockey team hian hma an hruai mek a ni.

Tun dinhmunah Paris Olympic ah hian Japan chuan gold medal 7, silver 2 leh bronze 4 lain hma an hruai a, China leh Australia ten an dawt a. India chuan bronze pahnih la tawhin 33 naah a awm mek a ni.

<><><>

VENEZUELA PROTEST

Venezuela President inthlana Nicolas Maduro thlan tlin a nih leh avangin rampumah lungawilohna lantir a ni a. Mipui lungawilo pungkawmte chu sipaiten mittui tlakna hlo leh rubber bullet hmangin an nawr kiang a. Nizan khan Central Caracas ah chuan President duhlotu mi sang chuang an pungkawm a. Sipai leh police ten mipui pungkawm hnawhdarh tum hian theihtawp an chhuah a, President chenna pana kalte chu an lo hnawtdarh a ni. Hetihlai hian Maduro-a campaign manager Jorge Rodriguez chuan tharum thawhna thlengah hian opposition te chu mawhphurtuah ah a puh a ni.

<><><>